

Wie ma Hosn fängt

Wie ma Hosn fängt? Do gibts a alts Rezept: Du streist su an Hupfa Solz und Pfeffa aufs Schwänzla - scho hostn. Des hot da Hann a gwißt. Ea woa Treiba und wää lieba Jächa gween, oba as Pulva woa 'na za teua. Su is 'a zan Schießn im ganzn Lem net kumma. ~~Eramol-hota-an~~ Eramol hota an Treibasteckn wie a klana Bu non Backn glegt und hot hintaran Hosn piff-paff heagschriea. Die Jächa hom glacht und da Hann hotsi sakrisch gärschat. "An Hosn mit Pulva und Blei za dawischn, is ka Kunst", hota gsocht, "oba mit da blankn Händ lewendi za fanga, is a mit Solz und Pfeffa no wos." Und kana brengats zam wie ea, maanta. Die Jächa woan auf des Stückla schorf und hom an Hann an Hektolita Biea vasprochn, wenna des in'aran Joha fäddibrächt. Da Hann hot eigshlong und scho woa die Sach ausgmacht.

A Joha is a longa Zeit. Zaöscht hot da Hann nei seina Jupntaschn Pfeffa und Solz, zwaa schöna Händ vull. Ka Treibjocht hota ausglossn, hot an Steckn nei die link Händ gnumma, wala die recht zan Solzstreia in da Taschn ghot hot. Oba die Hosn, die woan halt jedasmol za weit wech. As hotsi net gericht, und vom Joha woa am End bluß nu a Zipfala übrich. Widda senns ogstandn die Treiba, widda homs Krawall gmacht, widda homs no die Bama gshlong. Die Hosn senn gsprunga, die Jächa homm gschossn. Do sicht da Hann untaran Büschla a weiß Schwänzla. Halt, denkta, o den Schwänzla hängt wos und des is gwieße alta ausgewachsna durchtriema Hosnvorra, dea wu si vo den Krawall net narrisch machn läßt. Böaschla, des hilft dich nex, du ghöast mich. Ea langt nei seina Taschn, hult a Händvoll Mischgawöaz und haut des Solz und den Pfeffa den Hosn untan Schwoz zwischa die Baa. Etz hauts di um! Da Hos macht an Sprung saust wie da Blitz. Ka Küchala, ka Hund hotna eighult. Da Hann stieht und glotzt: Ja, Dunnakeil, net amol auf alta Sprüch kost di meha valossn. Auf amol kummtsna: Wos an Hosn hilft, denkta, ko an Treiba net schodn. Ea macht sei Husn hintn om Kreuz ledi, nimmt nu amol a Händvull Mischgawöaz, streit si des Pulva zwischa die hintan Backn - und etz halt di o - da Hann fehat davo wie a Raketn, hupft üba Staa und Boch, rennt und rennt, is scho etzat mitn Hosnvorra auf ana Höh. Ea langt nüba, packt den Frecka bo die Schlappohan und hotn - lewendi!! des woa a Gaudi. Da Hann hot sein Hektol Biea krigt und an Hosn dazü. Bluß des weiß Schwänzla hota hergem müün. Des hängt etz in Fuchsberch hintan Jächastammtisch, wal ja süst die Gschicht ka Mensch glam tät. Auf söttara Oat hot da Hann gwunna. Ocht Toch hota Brutzeit ohna Solz und Pfeffa gmacht. Nochatla woa oba alles widda in Oadnung.